

Bone rei datur consilium, ut presentis vite conferatur subsidium, ubi eterne remunerationis premium expectatur. Sciant igitur presentes ac posteri, quod ego Henricus de Rosenberch, preceptis divinis et salutaribus informatus, domui sancte Marie Virginis in Hohenfuort, quam pater meus pie memorie dominus Wokko multa benivolencia cepit construere et fundare, ecclesiam in Rosenberch cum filia in Mericha cum tercia parte decimarum et ius patronatus liberaliter omni iure tradidi perpetuo possidendam, ita tamen, ut abbas et conventus Iacobum sacerdotem, nostrum cappellanum, diebus vite sue non privent suo iure, ut fratres ibidem Domino iugiter servientes et pro salute mea atque progenitorum et successorum meorum fideles ad Dominum intercessores non alicuius necessitatis occasio aut desides faciat, aut robur sancte conversationis, quod absit, infringat, quia plurimis indigent, qui indigentias plurimorum conantur fideliter relevare. Ut autem hec rata permaneant et nulla queant in posterum calumpnia perturbari, presentem cartam ipsis tradidi mei sigilli munimine roboratam cum testibus subnotatis, qui sunt: dominus Andreas miles, Leupoldus, dominus Benata miles, Onscho, ipsius frater Nycolaus, Vlricus de Weischel et eius frater Bseborius, Troyanus suisque fratribus, et alii quam plures. Actum anno Domini M^o C^o C^o LXX^o VIII^o, indictione septima, epacta VI^a, datum in Rosenberch.